

Joost Meijs oficialmente ta CEO di Aruba Airport Authority N.V.

ORANJESTAD (AAN) – Despues di e anuncio cu a wordo haci na Maart 2019 door di Aruba Airport Authority N.V. (AAA) cu su CEO Sr. James Fazio a dicidi pa persigui otro oportunidadnan profesional, despues a anuncia na April 2019 cu Sr. Joost Meijs, ex-CEO di Eindhoven Airport, lo tuma e responsabilidadnan over di Sr. Fazio como AAA su CEO nobo.

Den presencia di su Excelencia Gobernador di Aruba Sr. Alfonso Boekhoudt, su Excelencia

Prome Minister di Aruba Sra. Evelyn Wever Croes, su Excelencia Minister di Turismo Sr. Dangui Oduber, su Excelencia Minister di Husticia Sr. Andin Bikker, Chairperson di e Junta di Directiva di Supervision Sra. Marion Kan hunto cu demas stakeholder y partner di aeropuerto, e CEO di AAA saliente Sr. James Fazio simbolicamente a pasa e trabou importante over na AAA su CEO nobo Sr. Joost Meijs cu un hard hat di construccion, un safety vest y un shovel.



“Aeropuerto ta pasando di e fase di planificacion over pa e fase di construccion di e proyecto Gateway 2030 y mi ta contento di por pasa e posición di CEO over na Sr. Meijs cu lo ta encarga pa lidera, guia y motiva e ekipo completo pa alcanza aeropuerto su metanan di expansion. Mi ta convenci cu e partnernan di turismo y aviacion lo brinda Sr. Meijs e mesun guia y confiansa cu a wordo duna na ami. Mi 5 añanan na Aeropuerto di Aruba no

lo tabata asina exitoso sin e sosten cu mi ta sigur cu Sr. Meijs tambe lo ricibi. Mi kier enfatisa cu mi a echt gusta mi tempo na Aruba y mi ta sinti mi honra di a wordo confia pa lidera Aruba su aeropuerto nacional pa e ultimo 5 añanan,” asina Sr. Fazio a bisa durante su discurso di despedida.

Tur Excelencia presente a expresa nan gratitud pa e esfuersonan di Sr. Fazio y na mes momento a desea Sr. Meijs hopi exito pa e

añanan nos dilanti unda e lo ta encarga pa lidera e ekipo di aeropuerto pa alcanza e siguiente milestone, mirando cu Sr. Meijs lo ta responsabel pa e desaroyo di management y e organisacion, mantencion di contacto cu stakeholdernan externo y lo guia e aeropuerto su proyecto di remodelacion cu ta bay cuminsa u e inversion importante di 5 aña di inversion y construccion cu un balor di 300 milyon dollar.

“Mi ta cla pa cuminsa e etapa aki cu hopi entusiasmo y determinacion pa concretisa loke e ekipo complete a visualisa durante e fasenan inicial di e proyecto Gateway 2030. Mi ta gradici Sr. Fazio pa su guia duna na e ekipo di aeropuerto durante e ultimo 5 añanan y e ta mi compromiso awo pa sigura cu nos ta finalisa e proyecto cu un aeropuerto cu nos tur por ta hopi orguyoso di dje,” asina Sr. Meijs a bisa durante su prome discurso dirigi na tur partner y stakeholder di aeropuerto como AAA su CEO nobo.